

worden / mit nichten gemeinet oder getadelt werden : Sondern vielmehr zu loben / wann die Philosophia hierinnen nach Gebühr vnd Gelegenheit / als eine Dienerin gebraucht wirdt. Es haben die Römer vor Zeiten die Philosophos auß ihrer Statt vertrieben / als Versührer vnd Verderber der Jugend: Wie sie auch vmb dieser Ursachen willen vnter dē Keyser Domitiano auß ganz Italia verwiesen worden. Die Messanii vnd Lacedæmonii haben ihrer niemals hoch geachtet. Der König Antiochus ließ ein Edict außgehen / beydes wider die jungen Leute / die sich auff das studium Philosophiæ wolten legen / vnd wider die Eltern / so ihnen selches hetten zugelassen. Vnd seynd nicht allein von Keysern vnd Königen verbannet vnd verjaget worden / sondern man hat auch viel gelehrter Leute gefunden / so wider sie geschrieben: Vnter wel-

chen einer ist Timon genandt gewesen / der ein Buch wider die Philosophos geschrieben / vnd dasselbige Sillos intitulirt. Desgleichen hat auch Aristophanes ein comœdiam wider sie geschrieben / welche er nebulas genennet. Dion Perusiacus hat auch eine schöne vnd gelehrte Oration wider sie öffentlich gehalten. Aristides hat eine schöne Oration wider den Platonem gehalten / zur Rettung vier nobilium Atheniensium. Hortensius ein beredter Römer vnd des Ciceronis æmulus, hat auch die Philosophos mit stattlichen Argumenten öffentlich angeklagt. Es haben sich ihnen auch andere widersetzet / vnd sonderlich der author flagelli scriptorum, welches Hortensio zugemessen wirdt. Dieses sey also genung von den Philosophis ihren Sattungen vnd Meynungen.

## A N N O T A T I O

## Vber den Sechs und zwanzigsten Discurs.

Wer einen kurzen vnd doch sehr nützlichen vnd schönen Begrieff der ganzen Philosophiæ vnd aller ihrer theilen vnd partium begeret zusehen / der lese das seminarium Philosophiæ tam Aristotelicæ, quam Platonicæ. Iohannis Baptistæ Bernhardi. Desgleichen das Panepisthemon Angeli Politiani. Item librum tertium Phisices Iohannis Thomæ Phregii. Vnd den indicem operum Cælii, bey dem Wort Philosophia. Item Cælium Rhodiginum lib. 4. cap. 30. antiq. lea. Welcher auch die laudes Philosophiæ beschreibet lib. 4. cap. 41. & lib. 16. cap. 7. antiq. lea. Die Oeconomicos insonderheit belangend / mag man sehen Pontanum in libro de obedientia, vnd Iacobum Fabrum Stapulensem.

## Der Sieben und zwanzigste Discurs.

## Von den Oratoribus, oder Rednern.

**D**ie / so wir heutiges Tages Oratores nennen / seynd vor Zeiten bey den Römern actores causarum genennet worden. Solcher seynd allezeit / wie Plinius meldet / drey in dem Adelichen Geschlecht der Curionum befunden worden / welche man nit mit geringer Verwunderung in gemelter familia angesehen hat. Sonst hat man derselbigen an allen Orten vnd auß andern Familien eine gute Anzahl gehabt / welche gemeiniglich / wie Macrobius libr. 5. Saturnalium meldet / nach ihrer Art vnd Gewonheit zu reden seynd unterschieden worden. Cicero hat eine weitläufftige vnd copiose Art zu reden gehabt: Salustius aber ist kurz vnd eingezogen gewesen. Fronto vnd Crassus gar trucken / vnd dürr im reden: Plinius Secundus vnd Simmachus, welche zu einer Zeit gelebt / haben ein floridum dicendi genus gehabt. Auch hat man einen sonderlichen Unterschied in ihrem stylo gefunden. Etliche haben einen maturum vnd gra-

uem stylum gehabt / wie Marcus Crassus: Etliche einen hitzigen vnd enzündten / wie Marcus Antonius. Homerus gibt dem Vlyssi einen Magnificum vnd prächtigen / dem Menelao einen subtilen / vnd dem Nestori einen Moderatum vnd sittigen stylum zu. So sind auch die Oratores nach irem gemeinen stylo, vnd nach ihren weisen zu reden unterschiedlich beliebet vnd geehret worden. Dahero dann Rutilius vnd Polybius erzehlen / daß sich jedermann vber die drey Oratores, so von Athen gen Rom gesandt worden / nemlich Carneadem, welcher ein Academicus, Diogenem, der ein Stoicus, vnd Critolaum, der ein Peripatericus gewesen / habe verwundert: Vnd habe sie beydes der Rath vnd die Burger schafft mit höchster Verwunderung vber eines jeden Art zu reden / angehoret. Dann es hatte Carneades eine vber die massen hefftige / Critolaus aber ein sehr grauem vnd anschnliche / vnd Diogenes eine gar glimpffliche vnd sittsame Art zureden.

Es